



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

***Komunikadu Imprensa***  
**Tribunál Distrital Suai**  
**04 Marsu 2016**

**Tribunál Distritál Suai hamonu pena tinan 9 ba arguidu kazu krime abuzu seksuál ba menór**

Iha 26 Fevereiru 2016, Tribunál Distritál Suai liuhosi tribunál movel iha Distritu Ainaro prezide leitura akordaun no kondena arguidu CT ho pena prizaun tinan 9 no selu indemnizasaun sivíl US\$500.00 ba lezada. Tribunál deskobre katak arguidu provadu komete krime abuzu seksuál hasoru lezada ne'ebé foin tinan 12. Tribunál mós kondena argudu selu kustu judisiál US\$35.00.

Ministériu Públiku akuza arguidu kontra artigu 177 alinea (1) Kódigu Penál kona-ba abuzu seksuál ba menór (ho penetrasaun) ho moldura penal tinan 5 to' o 20 prizaun.

Tribunál prova katak iha 28 Fevereiru 2015, arguidu aproveita lezada ne'ebé hela mesak iha uma, loke odamatan no tama ba iha uma laran. Arguidu kaer lezada nia liman no dehan katak nia hakarak halo relasaun seksuál ho lezada. Lezada rezeita no tenta atu hakilar maibé arguidu buti metin lezada nia ibun. Depois arguidu ko'us lezada ba iha kama leten, hasai nia ropa no komete violasaun seksuál hasoru lezada.

Durante julgamentu arguidu nega faktus hotu no deklarata katak nia so kaer deit lezada nia hirus matan. Mesmu nune'e, tribunál mantein ninia pozisaun katak arguidu provadu komete krime ne'e abuzu seksuál ba menór bazeia deklarasaun lezada, depoimentu hosi testemuña no relatóriu médiku hosi PRADET.

Antes ne'e, iha alegasaun finál, ministériu públiku husu ba tribunál atu kondena arguidu ho pena prizaun tinan 18 no kondena arguidu atu selu indemnizasaun sivíl ba lezada hamutuk US\$500.00. Entretantu defeza husu ba tribunál atu absolve arguidu tanba lezada la hakilar no la halo asaun ruma hasoru arguidu.

JSMP apresia tribunál sira kontinua julga no lori arguidu ba kazu sira ho natureza violénsia seksuál ba iha prizaun no aplika indemnizasaun sivíl ba vítima sira atu rekopera fila fali nia sofrimentu. Mesmu nune'e, JSMP hanoin katak desizaun ba kazu ne'e seidauk reflata ho gravidade hosi arguidu ninia hahalok. Krime abuzu seksuál hasoru labarik fo impaktu negativu no sériu teb-tebes ba labarik sira nia moris, afeita sira nia dezemvolvimentu psikolójiku no saúde

fiziku durante tinan barak no dabarak moris ho esperensia traumátiku durante sira nia vida tomak.

“JSMP enkoraza tribunál sira atu hola opsau legal hotu ne’ebé posivel hodi kondena arguidu ba kazu abuzu seksuál hasoru labarik ho pena todan liu ne’ebé disponivel iha lei penal atu impede ema seluk hodi komete krime hanesan iha futuru,” dehan Diretór Ezekutivu JSMP Luis de Oliveira Sampaio.

JSMP observa katak iha ona sentensa balun diak iha kazu abuzu seksuál kontra menór sira balun iha desizaun kazu sira iha ikus-ikus ne’e. Mesmu nune’e, sentensa sira ne’e la konsistente husi kazu ida ba kazu sira seluk. JSMP fiar katak kazu ida-idak iha nia sirkunstansia propriu no juis sira iha autóridade no diskrisaun rasik atu halo desizaun ba kualker kazu ida-idak, maibe JSMP enkoraza atu iha konsistensia iha kazu abuzu seksuál ba menór atu hatudu komitmentu no obrigasaun estudu hodi kombat kualker forma violénsia hasoru labarik sira.

Iha kazu sira antes, JSMP kestiona katak, tuir loloos ministériu públiku tenke konsidera atu akuza mós arguidu ho artigu 185 Kódigu Penál kona-ba violasaun ba domisíliu atu nune’e bele fo fatin ba tribunál hodi kondena arguidu ho pena todan liu. Mesmu nune’e, ministériu públiku falla atu identifika opsau legal sira ne’e hodi asegura kondensaun ida ne’ebé apropiadu ba kazu ida-idak.

JSMP preukupa ho alegasaun finál hosi parte defeza ne’ebe husu absolve ho razaun vítima la hakilar no la halo asaun ruma hasoru arguidu. Haree katak tribunál konsidera laiha rezisténsia hosi vítima ka hakilar nu’udar evidénsia ba konsentimentu hosi vítima ba relasaun seksuál ne’e. Maibe konsentimentu la relevante ba Artigu 177 (1), ne’ebé rekere deit prova relasaun seksuál ho menór ne’ebé sedauk halo tinan 14.

JSMP mós preukupa ho razaun/argumentu hosi defeze iha kazu ida-ne’e, tanba dalaruma iha razaun barak tanbasá vítima ida la rezisti ativamente ba relasaun seksuál ida ne’ebé nia la hakarak, inklui tanba tauk. Argumentu hanesan nunka bele uza iha kazu sira ne’ebé involve violénsia seksuál.

Kazu ne’e rejista iha tribunál ho númeru prosesu: 283/pen/2015/TDS. Julgamentu akordaun ne’e prezide hosi representante juis kolektivu, Dr. Costáncio Barros Basmery. Ministériu Públiku reprezenta husi Dr. Matias Soares no arguidu hetan defeza hosi Dr. Manuel Amaral hosi Eskritóriu Defensória Públiku.

Atu hetan informasaun kle’an favor kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)